

鄉土志業編

張國淦署





宜川鄉土志目錄

星野 附氣候

沿革

疆域

城池

山川

里甲

古蹟

勝景

風俗

一

一

二

三

四

七

八

一一

一一

宜川鄉土志

星野 附氣候

漢書地里志云秦地於天官東井輿鬼之分野其界自弘農故關以西京兆扶風馮翊北地上郡西河皆屬焉自井十度至柳三度謂之鶉首秦之分也

晉書天文志云自井十六度至柳八度爲鶉首於辰在未爲秦之分野

唐書地里志云關內道古雍州之城漢三輔北地上郡及弘農隴西五原西河雲中之境京兆華同鳳翔邠隴鄜坊丹延綏宥爲鶉首分

清類天文分野書云井鬼在未自井九度至柳三度屬秦分雍州則陝西永興鳳翔隴邠丹同華耀坊延鄜興元及西夏之西偏秦鳳之西北皆秦分也 按漢書晉書及天文分野書分度俱微異並存俟攷

附晉書天文志云斗一至四爲魁魁一星曰天樞主秦 北斗屬紫微垣係三垣中之星

主秦分者 石氏云北斗七星一主秦二主楚三主梁四主吳五主燕六主趙七主齊

官川雜志  
春秋文耀鉤云華岐以北龍門積石南至三危之野雍州也屬魁星

附氣候

延地僻處西北逼隣沙漠寒早暑遲郡志所云三月而冰始泮四月而花始發麥成在夏至之後霜降或仲秋之期盛暑不廢羔裘嚴寒必資王室其天較也而宜居郡最東南隅南接同屬東連晉省天氣較諸縣微暖五谷收成亦視諸縣略早然風高土燥每交夏令最慮缺雨偶得暴雨又慮帶雹入秋亦懼早霜若夏月霖雨應期秋後天氣和暖則歲收豐稔民間食用稍裕云

沿革

宜川周白翟地春秋時屬魏爲定陽邑秦置上郡定陽隸焉兩漢因之魏省晋陷苻秦爲羗地十六國春秋云苻生壽光二年姚襄屯杏城使姚蘭扇動定陽羗胡是也後魏置樂川郡領樂川縣太和八年於薛河川置安平縣屬樂川郡十八年於白水川置永寧縣西魏復於古孟門河西地置義川郡大統三年置義川縣因川爲名屬義川郡又置汾州理河西三堡鎮十三年置雲岩縣改永寧縣爲太平

縣十七年改安平縣爲汾川縣廢帝三年改汾州爲丹州後周大象元年分汾川  
雲岩二縣地置門山縣又改義川縣爲丹陽縣隋開皇初廢義川郡并廢樂川郡  
入丹州仍復丹陽爲義川縣屬延安郡十八年改太平縣爲咸寧縣大業初廢門  
山雲岩二縣入汾川縣屬延州又廢丹州義寧七年於義川縣置丹陽郡縣在城  
內唐武德元年仍改爲丹州又析汾川置門山縣析義川置雲岩縣天寶元年改  
丹州爲咸寧郡乾元元年復爲丹州五代周廢咸寧縣宋初復置以丹州咸寧郡  
屬永興軍路太平興國初始改義川縣爲宜川避太宗匡義諱也熙寧五年省汾  
川縣并以酈州廢咸寧縣入宜川七年又省雲岩爲鎮入焉屬丹州改門山縣屬  
延安府宋南渡隸金仍以丹州領宜川縣元至元二年省門山縣入宜川至元六  
年復并丹州入宜川縣屬延安路至正十五年參政朱希哲守之明洪武三年師  
克延安希哲與部將脫烈伯顏領軍民歸附仍爲宜川縣隸延安府 國朝因之

附

竹書紀年后啓征西河陝西通志註云禹貢西河自龍門以下皆是卽正義所謂

丹同二州也

按丹州在龍門上流並非龍門以下通志悞

竹書紀年帝乙十七年西伯伐翟陝西通志云周時延安以北皆爲翟境商末之

翟亦應在其地

按宜川在延安東南並非延安以北是否翟境存攷

魏書地形志鄜城郡有定陽縣在今鄜州鄜城縣界陝西通志註云定陽在今洛

川縣界

按此則北魏尙有定陽縣屬鄜城郡府志沿革表通志建置表內俱不載俟攷

寰宇記魏置安平縣屬北汾州

按此與元和志所載安平縣屬樂川郡互異存攷

元和志魏永樂縣屬義川郡

按永樂縣府志沿革表通志建置表內俱不載存攷

元和志隋大業元年廢丹州於義川縣置延平縣十三年爲劉步祿所據 按延平

縣府志沿革表通志建置表俱不載存攷

通鑑註義寧元年分延州之義川咸寧汾川置丹州咸寧郡 按此與唐書地理志所載

天寶元載改丹州爲咸寧郡互異存攷

### 疆域

宜川東至山西吉州界一百里西至鄜州界九十里南至洛川縣界七十里北至

延長縣界九十里東南至韓城縣界一百里西南至洛川縣界一百里東北至延川縣界二百里西北至甘泉縣界九十里

宜川東至山西吉州治一百七十里西至鄜州治一百八十里南至洛川縣治二百里北至延長縣治一百八十里東南至韓城縣治二百三十里西南至洛川縣治一百九十里東北至延川縣治二百八十里西北至甘泉縣治二百八十里  
宜川距府二百六十里距省由韓城縣東路七百二十里由洛川縣西路七百里由延安府大路九百八十里距京二千三百五十里

附形勝

郡志云宜川東據黃河南阨孟門峻嶺廣阜名勝要區

城池

宜川城池宋初改建元至正中叅政朱希哲修明正統十四年知縣張繹重修周四里一百二十八步高三丈土身磚堞門四東門曰先春南門曰迎薰西門曰阜成北門曰鞏鑰西南跨七郎山東西北三面距河城根鑿品字窰爲池深三丈今



湮 國朝順治四年知縣陳辰銘補築南甕城門額曰古丹州雍正三年知縣王  
志深重修東城門歷年久遠城樓雉堞及城身日就坍塌而環西一帶銀川水傍  
城而流每當夏秋上流積雨新漲奔馳沖突而來勢如箭筒歲加汕刷傾替更甚  
沿城舊有護城石臺亦被水搏擊多半斷缺屢經奉文估計 題准急修嗣乾隆  
十年 欽差侍郎三會同督撫核計通省衝僻列入再次急修爾時知縣劉國泰  
相度西門外河西灘地有淤塞河形尙存遺跡建議復行開挖引水離城俾城垣  
石臺不致重遭沖壞亦經詳請奏明惟是議開新河而未及議塞舊河恐水勢舍  
紆就直復歸舊河仍與城工有碍不無遺議經現任知縣吳炳稟請築壩阻水引  
併新河奉委道府勘議允行俟屆修之日次第興工

附 鎮 集

秋林鎮 縣東三十里其傍又築砦屬加陽里

孟嘗鎮 縣西四十里屬西川今廢

雲岩鎮 縣北八十里後魏置縣今爲鎮城址尙存

中山鎮 有堡在縣西八十里今廢

百直鎮 縣北九十里屬豐慶里商賈貿易之地

店頭鎮 縣東北八十里屬汾川里今廢

閣樓集 縣東北九十里屬汾川里

安河集 縣東北一百二十里屬平樂里

山川

七郎山 在城內西南隅縣主山也上有石洞建達觀樓相傳宋將楊業之子七郎屯兵處

鳳翅山 在城外河東每朝煙至日高方散八景中鳳翅朝煙是也上有石臺寺大佛閣山至唐咸寧忠武王渾瑊廟在焉

文峰山 在縣南城外上有磚塔舉人劉子誠建

虎頭山 在城外河北八景中虎頭夜月是也赤石銀川二水會於其下

公字山 在縣西北三里形象公字

人祖山 在縣東十五里屬加陽里

牡丹原 在縣東三十里秋林鎮東山上屬加陽里相傳昔時盛產牡丹其花滿山香聞數十里土人採以爲薪

安樂山 在縣東北七十里高樹嶺東平佐康寧二里分界處一抹平原忽起孤峯秀入雲表上有真武廟九域志云相傳昔時屯兵於此主帥令唱安樂詞以懈勞諸軍故名 按府志載在縣南十里誤

雲岩山 在縣西北八十里山形重疊如雲魏雲岩縣以此名寰宇記云在雲岩縣東十里

庫利山 在縣西北百里屬雲岩里與舊臨真縣相接明一統志云庫利山在宜川縣界

丹陽山 在縣西南一名丹岩山即縣之面南山也脈自洛川界牌山來爲邑主山雍勝略云丹岩山上有仙人煉丹爐水經注云丹水出丹陽山

壓石山 在縣南九十里

殺狗嶺 在縣東北九十里寰宇記云在汾川縣西

晉祠山 祠一作師在縣西南百里屬西川與鄆州接界昔晉文公會駐師於此

石堡山 在縣東百里屬汾川里黃河流其東雲岩河繞其西南北三面山壁立如削今修爲砦

牛心山 在縣東九十里屬汾川里緊連石堡雲岩河環繞四面今修爲砦

孟門 屬平佐里在縣東北一百里黃河中任水漲滔天終不能沒前郡守徐洹

瀛鐫臥鎮狂流四字於其上寰宇記云在汾川縣東二十里明一統志云在石澗

下三里與山西吉州接界黃河中流大石橫亘數百步河水分流俯視如門禹鑿

石導流之處魚之溯河者扼此又石澗在水南村黃河中遠望橫崖數百丈其形

壁立水氣噴薄如霧人不能近土人呼爲澗口穆天子傳云北望孟門九河之磴

水經注云孟門卽龍門之上口也實爲黃河之巨扼此石經始禹鑿河中激廣夾

岸崇深傾崖返捍巨石臨危若墜復倚其中水流交衝素氣雲浮往來遙觀者窺

潏悸魄懸流千丈渾洪轟怒濬波頽疊迄於下口方知慎子下龍門流駛竹箭非

駟馬之追也禹貢錐指云西直宜川縣與韓城之龍門相對在黃河中長七十餘丈

石閣山 在縣北一百二十里屬安仁里今呼爲高山孤聳入雲俯視羣山下瞰黃河上有千佛閣玄帝宮天神廟中有井今修爲砦寰宇記云在雲岩縣東北三十里丹延兩州界形似樓門

石鷄山 在縣北一百二十里屬仁里

蟒頭山 在縣東九十里屬白水里山聳起如蟒頭人曾於迅雷濃霧中隱見有龍每春暮桃花與松栢相間

壽峰山 在縣東南一百二十里屬白水里高秀奇險有石砦

盤古山 在縣東南一百四十里屬河清里孤峰突起俯視萬山如黍豆之案中  
有井盛夏猶多積雪石碣剝落難曉傳爲盤古氏卜婚處

八郎山 在縣東南一百九十里屬河清里濱臨黃河高峻險極與韓城縣接界  
有廟祀八郎神順治五年妖兵盤踞於此旋即掃平

重覆山 在縣東北四十里寰宇記云在門山縣東二十七里以山形重疊故名  
珍珠山 在縣北二百里屬平安里相傳爲呼延瓚屯兵處今修爲砦

黃河 在縣東由延川界至本縣馮家抓入境南至流源頭入韓城界計三百餘里與縣境相終始東岸即大寧永和吉州鄉寧等地中有壺口孟門即禹貢所謂既載壺口是也元和志云黃河在門山縣東三十五里又在汾川縣東七里河岸頓狹狀似槽形鄉人呼爲石槽蓋禹治水鑿石導河之處石槽長一千步闊三十步懸水奔流鼉鼉魚鼈所不能游

銀川水 今名西川在縣城西源出鄜州之晉師山下有龍湫東流入宜川境龍泉村逕固城里直冲縣西城根離城一里有潭水勢自高而下甚湍激相傳潭內有石甕三繞

城北流又逕縣東與赤石川合再東與仕望川合逕加陽康寧等里至關頭渡上流十餘里清河口入黃河按名清河者以至此將入河水尙清別黃河之濁得名

南川水 一名赤石川又名義水源出韓城縣神道嶺西北流至本縣富曲村合丹陽水流逕縣之東北二門合仕望銀川二水入黃河陝西通志云南川今皆以爲赤

石川然元和志云丹州唐移於赤石川口寰宇志云赤水川在縣西北二里從臨真縣流入則赤石川當即今之仕望川非南川水也故寧存疑不敢強合按此說與目下形勢不同存攷

丹陽水 卽丹水有名偏城川在縣西南源出洛川縣界牌山東北流入宜川縣境赤土坡至富曲村與南川水合遶城東北二門逕虎頭山下與西川水合再東北與仕望川水合并入黃河

仕望川 在縣西北四十里源出甘泉縣界之鐘樓寺山東南流入宜川西境降仙里界東逕加陽里與赤石銀川二水合再東逕康寧里至關頭渡上流十餘里清河口入黃河

白水川 在縣東南八十里屬白水里以水色偏白名中有小蟹少黃源出本縣路道嶺折向東北歸黃河通志云白水在丹水之下入河恐非水經注之白水

河清川 在縣東南百一十里屬河清里水至澄清雖淋漓不渣源出韓城縣硃砂嶺稍向西北流入縣境折入東北歸黃河

汾川水 卽黑水一名庫利川一名雲岩河在縣北八十里源出甘泉縣九峪溝

麻洞川東南入本縣雲岩里界東逕安富汾川等里行一百七十里至柴村渡南流入黃河水經注云黑水源出定陽縣西山二源奇發同瀉一壑東南流逕其縣北又東南流合定水定水俗謂之白水出定陽縣南山定水谷又逕定陽縣故城南又東注於黑水亂流東南入於河元和志雲岩縣有庫利川在縣郭南昔有賊居此川內稽胡呼爲庫利故名

清水 一名岔界河在縣東北一百二十里源出安塞縣蘆關嶺南流至府城東合濯筋水逕延長縣至白家河入本縣平樂里界在東南歷豐慶安仁平安三里計一百五十餘里兩岸皆石河道逼窄過渡甚險至禹王坪渡歸黃河

澤徑水 在縣東北百二十里東流入黃河寰宇記渭牙川在雲岩縣北二十五里從延長界來五十里入門山縣界川內有水木稽胡呼水木爲渭牙因名金史地里志門山縣有渭牙川陝西通志云澤徑水卽渭牙川也疑當別有一水乃今皆以清水指爲澤徑誤矣

小清水河 在縣極北從延長交界之楊家村入境東逕平樂平安二里歸黃河



鹿兒川河 發源縣東三十里焦石碣東南流過蟒頭山至關頭渡歸黃河

甘泉 在縣西十五里屬西川水至清冽盛夏煎茶隔宿不腐

聖惠泉 在縣河東鳳翅山渾忠武王廟內泉極甘美深二三丈龍常吸水其中旱禱有應且能療疾八景中聖水垂虹是也

石臺泉 在鳳翅山石臺寺大佛閣右水至甘冽

蓮池 在城隍廟古舊學址內八景中蓮池春漲是也

晴川口 卽今馬頭關也草木茂盛絕無蚊蟲夏時人爭趨憩

閻家灘 在縣北一百四十里屬平樂里

里甲

宜邑舊分四鄉曰三寶曰仁義曰永和曰承寧編里二十有四曰固城降仙仕望雲岩太平茹平康寧長樂平佐西廻太吉懷德平安平樂豐慶太留汾川靖安白水加陽河清仙香府曲豐城共廿四里分屬四鄉康熙年間又併爲四里曰嘉城康吉汾豐安岩今復分十七里地糧祇編十五里西川南川地糧分附各里又汪

韓里係魏地新由膚施改隸宜川

固城里 自縣附郭數里南至距城三十里郭家灣止

加陽里 自縣東五里范家灣至距城三十五里掌裏止

降仙里 自縣西北二十里定羊村至距城五十里槐坪止地狹戶少不分甲

安富里 自縣北四十里偷石村至距城八十里北坵村止

汾川里 自縣東北七十里寧遠至距城一百里驃騎村止

康寧里 自縣東三十里大村至距城九十里老窰窠止

安仁里 自縣東北一百里樹落村至距城一百五十里貼村止

西廻里 自縣西北五十里馬仁嶺至距城八十里羊坪止

雲岩里 自縣西北五十里高樓至距城九十里泥灣止

平佐里 自縣北三十里平路堡東至距城一百二十里小船窩止

豐慶里 自縣東北九十里北赤鎮北至距城一百三十里固州止

白水里 自縣東南三十里路道嶺至距城一百一十里馬家山止

平樂里 自縣東北一百五十里皮頭至距城二百里後河止

河清里 自縣南六十里羊落村至距城一百里羊平止

平安里 自縣東北一百里左喜至距城二百六十里馮家城止

南川 自縣南十五里程落村至距城八十五里董家河止不分甲

西川 自縣西五里平至距城八十五里龍泉止不分甲

汪韓里 自縣西南四十里趙家城至距城九十里楊村止不分甲

### 古蹟

丹州故城 在縣東北二十九里魏大統三年置汾州理河西三堡鎮 見元和志

廢帝三年以汾州與河東汾州同名改爲丹州因丹陽川爲名 見周書文帝本記隋

大業初廢丹州義寧七年於義川縣置丹陽郡縣在城內 見元和志 唐武德元年

仍改爲丹州天寶元年又改丹州爲咸寧郡乾元元年復爲丹州 見舊唐書地理志

永徽二年移於赤石川 即今治地見元和志 宋初以丹州屬永興軍路 見通考 元至

元六年併丹州入宜川縣屬延安路 見元一統志

郡志云以下五址諸記志參差不一道里遠近亦不一或即其地改其名或改其名並易其地要之古宜川在郭下今宜川在赤石川口因汾川置汾州改名不易地者也以汾川改丹州改名並易其地者也雲岩則別置者也門山又分汾川雲岩之地而別置者也丹州領宜川雲岩門山諸縣指郭下之宜川丹州唐永徽中移於丹陽則赤石川口之宜川矣按西魏大統三年置汾州在先大統十七年始改安平爲汾川縣在後並非因汾川置汾州至丹州由汾州改名並非以汾川改丹州郡志誤

雲岩廢縣 在縣西北八十里魏大統十三年置雲岩縣以山形重疊如雲故名

見寰宇記 隋開皇初移雲岩就廢樂川縣 見寰宇記 大業初廢雲岩入汾川縣 見隋

書地理志 唐武德元年復析義川置雲岩縣於廻城堡咸亨四年移庫利川開元

三年移於東南百步卽理所 見寰宇記 宋熙寧七年省雲岩爲鎮入宜川縣 見宋

志 按郡志載後魏置唐因之未確

汾川廢縣 在縣東北九十里魏太和八年置安平縣理薛河川屬樂川郡 見元

和志 大統十七年改安平縣爲汾川縣理高樹山南 見元和志 後周保定二二年移

汾川縣於庫利川北 見寰宇記 隋大業初移理土壁堡屬延州 見寰宇記 唐武德

元年又移汾川理於甘泉坊 見寰宇記 宋熙寧五年省汾川縣入宜川 見宋志

按郡志載後周改汾川誤

門山廢縣 在縣北一百里門山村有故城二十餘丈 寰宇記載在縣西七十里一統

志載在府東南八十里俱未確 後周大象元年分汾川雲岩二縣地置門山縣以北有

山形似門故名卽漢定陽縣地 見元和志 隋大業初廢門山縣入汾川 見隋書地理

志 唐武德元年又析汾川置門山縣治宋斯堡隸丹州 見舊唐書地理志 宋熙寧七

年改門山縣屬延安路 見宋史地理志 元至元二年省門山縣入宜川 見舊通志 按

郡志載周宣帝置唐宋金因之未確

咸寧廢縣 魏太和十八年於白水川置永寧縣大統十三年改永寧縣爲太平

縣 見隋書地理志 隋開皇十八年改太平縣爲咸寧縣以界內有咸寧鎮爲名 見元

和志 五代周廢咸寧縣 見職方考 宋初復置屬永興軍路 見通考 熙寧五年以鄜

州廢咸寧縣入宜川 見宋志 郡志云咸寧故城一統志在縣東四十五里國初通志在縣東一

百里今縣東皆大峰峻嶺無可立縣處當在白水里境內則通志爲確

壺口 上流寬廣至此收束歸槽如壺之口然故名勝志云縣北石澗下 村名

三里 郡志云縣北之縣指古宜川在郭下者非今縣治 黃河中流有石阨之蓋禹鑿石導流

之處謂壺口也禹貢壺口註引漢地理志謂在北屈縣東南北屈即今山西吉州

按壺口在吉州西南漢地理志誤 宜與吉相對止隔一河其地面水勢偏重在宜故土

人以壺口爲滴澗云石澗在原上近澗故以此名村村頭有古碑書壺口佳境兩

省通衢蓋指石澗下水南渡口也又按水經注數里之外便覺霧雨霑人則水勢

排空迅如箭括其高九里之言不虛矣 附地理今釋云韓城縣龍門山在大河之西東與壺

口隔水相望按壺口在龍門上流五十餘里並非東西相望地理今釋悞

七郎山寨 在城南爲邑主山舊傳宋將楊業之子七郎屯兵築城地勢險阻元

參政朱希哲據守

達觀樓 在城西南七郎山上明知縣苗邦瑞重建因名有記

玉蓮池 在縣北廣千頃多重異蓮爲一方勝今堙

聖水亭 在渾王廟前井上

御祭亭 在渾王廟前曾陳列御祭故名今廢

白鶴觀 郡志云觀故址在縣南去縣僅三里有倒碑故俗號碑子衎衎碑文剝落不可讀約略其詞乃唐明皇夢李耳云吾汝始祖命近臣訪我於東北五百里外當授汝符瑞兼國祚長短覺後乃選遣五兵尙書牛仙客往如夢求之惟肖所告之詞甚秘然多奇中卽此地起觀制類輿慶宮鐘鼓之聲聞數里軒轅皇帝之封始於此後數年再見於揚州故兩地皆有白鶴觀此爲夢真容敕彼爲夢真容碑也碑倒五百年五代勸農使立之復倒五百年土蝕其半按金石錄再考之唐人詩話始得其概如此偉跡雍錄大記通志皆未收則古碑埋沒於窮谷者多矣

庫礪

庫礪 在縣西北二十里川南爲漢北爲蕃其人於川內共締香火故呼香火爲

鶴舞臺 在縣南山內相傳洞賓曾遊此白鶴舞於其上

翠微亭 在縣北八十里張橫渠曾講學於其間今廢

聖馬道 在縣北九十里相傳唐太宗乘馬至此乳駒石上有馬蹄遺跡考之史

策爲唐肅宗獵於宜川太宗並未至宜疑誤

元豐石刻 在西城外巖下題云高渙濟川李孝鼎世斫馬唐民彥先謝舜賓子

元任牧之謙叔陳明之晦叔郭仲益舜俞元豐辛酉歲仲春二十有四日同觀修

山城舜俞題

政和石刻 在西城外巖下題云皇城使知丹州孫廣朝請郎通判朱定奉朝旨

勸農回率如京 三字疑誤 使鄜延路弟八將 案內殿承制前兵馬都監李芳內

殿承制都巡檢使孫愔內殿崇班前兵馬都監趙叔紕左侍禁 巡檢王進宜

川縣令孫金主簿張察縣尉薛覺民會飭巖下時政和二年八月二十日孫愔奉

命書 內有圈者皆字漫滅不可識又左側尙有石刻一字俱剝落難辨

勝景

聖水垂虹 渾王廟內有聖惠泉相傳龍常吸水其中祥光輝映

雲岩疊翠 雲岩鎮西有山曰雲岩綉巒層疊宛如畫景

鳳翅晨煙 東城外鳳翅山每朝煙至日中方散



虎頭夜月 城外河東之虎頭山二川會於其下夜則冰輪相映景色最佳

丹嶺秋容 城內七郎山屬古丹州治故稱丹嶺其山蒼松翠色秋晴可掬

蓮池春漲 城隍廟右舊學址內有池水淋漓春色媚人今湮

石臺鐘聲 在鳳翅山大佛閣右以石爲臺懸鐘叩之聲聞最遠

仙觀水色 城西十五里有甘泉觀傳二道自此仙去迄今水色靄浮

按郡志作城西五十里誤

### 風俗

宜民愿朴罕染澆漓之習士子橫經半兼負耒雖乏文采亦少武斷把持敗類惟山僻生監間多夜郎自大然曉以禮法頗易回心嚮道田家全恃天時鮮施人力翻耕佈種便屬勤農過此卽坐待雨澤不事墾耘每有下種後趁食他鄉至收穫始回者近經 督撫憲刊示曉諭邑令巡歷鄉村隨地講解始漸習培糞薶茶之法工匠拙於營造製器粗劣奇技淫巧不禁自絕至挾貲逐末猶非所長蓋緣土瘠民貧千金之產輒推上戶旣無餘財可資營運兼智慮短淺籌算未工城內市

歷以及各鄉鎮集均係隔河晉民暨隣邑韓城澄城等處商賈盤踞漁獵坐致奇  
贏土人袖手睥睨莫與爭利也一切儀節多從簡略冠禮久廢婚禮初聘時兩家  
互送庚帖修以禮儀不用婚啓將娶先延女家長幼面訂吉期謂之議話議定隨  
具銀幣衣飾致送謂之送錢婚前三日男女家各請外氏宴飲謂之告外家次日  
男女外家各饋儀物厚薄不等謂之洗頭至日兩家俱不行醮禮婿不親迎擇老  
成婦女迎親彩輿內置一童男忌空也女家亦擇婦女送親婦人入門不行合巹  
禮次早卽謁廟并見尊卑親屬婿卜吉赴婦家曰謝親新婦卜吉歸寧曰回面其  
居母家以初至婿家日多少爲準及歸婿家見尊璋暨族黨各有所餽亦贄幣遺  
意也富家婚嫁多在十二三歲時血氣未充斲喪太早夭折之多未必不由於此  
至喪妻再娶率重寡婦而輕室女以室女不諳操作寡婦必善持家一有寡婦居  
爲奇貨索價動逾百金恬不爲怪喪禮逢七享獻至七七止謂之供七子百日不  
剃頭侄及諸孫七七不剃頭服必實滿三年應舉子試者雖遵功令二十七月服  
闋仍持私服至三期始易吉及葬鄉民第稱家有無士夫或間以歌舞宴客相尙

中人動輒破產有家計艱窘耻受儉親之名遂至停柩數十年者殆所謂禮失當求諸野乎祭禮既享神主於寢復行祭墓凡遇四時八節俱詣墳瞻拜男女環遶號哭盡哀乃罷廬舍不過三間五架制甚狹小村落率多窳居吉凶贈賻儀物儉陋或升粟尺布或隻鷄樽酒不以爲薄晏當用小器不過十器前令范式金立五簋約酌定四肉一菜誠教儉良規邑人多違行之鄉民淳慤或過客暮抵其家卽不識面問悉其人行踪輒具飯設榻不敢醺值頗敦厚道

郡志云先輩論延民有四美一結姻不論財一交友多重義一思先時盡哀

每遇

佳節門前焚楮繼之以哭

一好善勤施捨

即貧乏者聞修廟設醮亦必喜捨

有一病曰惰流

水可灌田而惰於疏濬間田可樹木而惰於種植女惰蠶織男惰經營而常憂衣食之乏按後二美頗近宜俗至惰之一字則邊民通病而宜川爲尤甚

通志云宜川民漸知種桑菓興蠶事又時置機杼習紡織衣食之資視前稍賴焉按宜川民亦曉織布但未能比戶嫻習大收織作之利至種桑養蠶屢經

督撫

憲刊示勸諭邑令復抄錄蠶桑輯略蠶政編等書分給各里並傳示絲車俾各照

造供用近來漸知做倣但宜川地近邊關寒多燥少氣候稍遲桑不易長長亦後晴溫蠶成繭究屬太晚且所產之絲不甚柔潤而多斷續現止平安平樂二里能抽絲織絹其他僅藉以爲線若紬紗非此絲可成云

元日家家食餛飩拜祖廟後無論親疎槩詣門賀新二月二日於五更後圍灰道避虫清明戲鞦韆拜墳作饅頭相餽上綴各樣虫鳥名爲子推謂晉文焚山禽鳥爭救子推也端陽插艾作角黍飲雄黃酒中秋以西瓜棗糕相餽重陽日造菊酒謂歷久不壞十月一日剪紙爲衣前夜焚之謂之送寒衣冬至拜官師親友交拜臘月初八日作糯米或黍米粥襍以猪肉豆腐謂之臘八飯廿三日夜以雄鷄糖瓜祭灶神除日親黨造門辭年夜守歲